

ARTICLES

REMONSTREZ A
MONSIEUR LE Duc
de Mayenne, Lieutenant Ge-
neral de l'estat & Couronne de
France, par monsieur le Recteur
& l'Vniuersité de Paris, le 29.
Nouembre. 1589.



A P A R I S,

Chez Guillaume Chaudiere rue S. Jacques à
l'enfeigne du Temps & de l'homme
Sauvage.

M. D. LXXXIX.

Avec Permission.

A. J. 1815

A. J. 1815

A. J. 1815

A. J. 1815

A. J. 1815

A. J. 1815



A. J. 1815

A. J. 1815

A. J. 1815

A. J. 1815



ARTICLES REMON-
STREZ A MONSEIGNEVR
le Duc de Mayenne Lieutenant
General de l'estat & Couronne
de France, par Monsieur le Re-
cteur & l'Vniuersité de Paris le
29. Nouembre. 1589.

MONSEIGNEVR,
Combien que nous ne
doubtions aucunement
que ne soyez suffisamment
informé, tant par vostre
bon & tresprudent aduis que par fre-
quentes remonstrances qui vous ont es-
té faictes, de tout ce qui peut concer-
ner le reſtabliſſement de la religion Ca-
tholique, & le repos entier de la France,
& particulièrement de ceste ville de Pa-
ris: ce neantmoins la neceſſité du tēps,
le deu de noſtre charge, & le cry, & iuſte

importunité des plus zelés & notables bourgeois de ceste ville, qui ne sçachans plus a qui auoir recours, se sont adressez a nous & nous pressent incessammēt pour cest effect: comme aussi l'interest particulier de ce corps d'Vniuersité que nous representons, membre des plus nobles & plus necessaires de ceste republique, pour estre la pepiniere de toute pieté & doctrine, tant pour ce Royaume que pour les autres nations, nous faiēt prendre la hardiesse, ains nous cōtraint vous représenter, avec le respect & reuerence que nous vous debuons, non tant les doleances communes (que n'entendéz que trop) que certains articles qu'estimons y pouuoir apporter remede, recueillis de la voix publicque & fraischement concertéz, redigéz par escript, & leuz publiquement en nostre assemblee generale, selon la forme & maniere, dōt presentement, avec vostre bon congé & patience nous vous ferons lecture.

I. En premier lieu, pour le regard de ceste ville de Paris, de laquelle tout le faiēt semble consister a desgaiger le dehors & asséurer le dedans, Nous vous

prions de faire, tât que possible sera, que les passages & aduenues nous soient rédues libres.

II. Qu'ordonniez estre promptement arrestéz & punis, sans aucune conuiuēce, tous ceux qui font estat de refroidir lezele & bonne volonté des Catholiques, & mesme de retarder en quelque sorte que ce soit les subuentions accordées.

III. Que commandiez estre remarquees, sans exception, toutes les maisons par chacunes dixaines de ceux qui sont du party contraire, pour d'iceux estre fait le procez, leurs biens saisis pour employer au payement de la gend'armerie, & que registre en soit fait, qui sera gardé en l'hostel de Ville.

IIII. Et d'autant qu'un homme seul, ~~tel~~ ^{est} monsieur le Lieutenant Ciuil, ne peust suffire à la police du bled & du bois, que la charge en soit dōnée a quatre notables Bourgeois de ceste Ville, qui s'en sçauront deüement acquiter, pour euiten l'esmotion populaire.

V. Quand au fait des armes, qu'il vous plaise nous pouruoir en vostre absence

d'un Gouverneur, qui prefere la Religio
& le bien public a son particulier, en qui
le peuple ayt creance (considerant que
de la conseruation de ceste ville, depend
le salut de tout le Royaume) cōme pour-
roit estre l'un de Messieurs vos enfans
pour autorité, assisté de mōsieur l'Arche-
uesque de Lyon pour Cōseil, & de quel-
que notable Seigneur, anciē & experimē-
té Capitaine, pour la force & execution.

VI. Pareillement que ceste ville ne de-
meure despourueüe de forces suffisantes
tant de pied que de Cheual, & princi-
palement estrāgers, en tel nombre que
verrez bon estre. Ordonner aussi que par
les cartiers y ait de bōs Gétils-hommes
experimētez au fait de la guerre, pour in-
struire les habitās & Bourgeois, qui y se-
rōt propres aux armes & discipline mili-
taire, & disposer au besoin le rēdez vous
d'un chacun, pour euitier la confusion
que nous auons veu aux affaires qui se
sont passées, & qui ont presque causé
nostre ruyne.

VII. Aduiser, si pour le petit nombre des
Escheuins, & la multitude & immensité
des affaires pour le temps ou nous som-

mes, il ne seroit pas bon d'assister mes-
sieurs le Preuost des Marchans & Esche-
uins de seize coadiuteurs, à sçauoir, vn
qui soit esleu par chascun quartier, tant
pour rapporter chacun à la ville les
plaintes & necessitez de son quartier,
pour y faire donner remede, que pour
assister aux fortifications & autres affai-
res selon qu'il escherra.

VIII. Aussi de changer les Colônels &
Capitaines suspects, tât absens que pre-
sens, & estre mis en leur lieu d'autres plus
zeléz & affectionnéz.

IX. Quand au general des affaires,
qu'il vous plaise prendre garde a ceux,
qui suiuañs les anciènes & dāgereuses ma-
ximes ausquelles ils auroient esté nour-
ris & entretenus; par artifice de con-
seil ou autrement sont cause du mauuais
estat des affaires. Et que comme ainsi
soit, que Dieu assiste particulièrement
les grands Capitaines & Gouverneurs
tels que vous estes, il vo^{us} plaise faire estat,
cy apres de ce que particulieremēt Dieu
vous inspirera, & des aduis que prendrez
de vous mesmes. Et au surplus, ne vous
cruir en conseil que de gens de con-

science & bonne reputatiō, qui dressent selon Dieu vos affaires, au but de la religion & repos public, pour lequel vous combatéz: auquel conseil donniez quelque heure par iour de vostre presence, vous deliurant durant ce temps de toute autre affaire & importunité.

X. Plus, faire appeller au Conseil General, deux ou trois de chacune Prouince, qui seront pour cest effect esleus solennellement, & honnestement stipendiéz par lesdictes Prouinces, & ce, tant pour authoriser vos commendemés, que pour entretenir l'Vnion & mutuelle intelligence des villes, en tirer le secours qu'elles doiuent apporter, & empescher par lettres veritables les faux bruits, que les ennemis font courir par leurs escrits à nostre grand preiudice.

XI. Ordonner, estre faiēt registre, de tous les benefices detenus par ceux du party contraire, pour en faire nommer d'autres capables en leur lieu par sa sainteté, ou son Legat: & ce pendant, employer le reuenu desdicts benefices, aux frais de la guerre, & aussi saisir, a ce mesme effect toute autre sorte de biens, qui peuuent

peuvent appartenir aux ennemis, tant
 es villes, qu'aux champs.

XII. Faire raser les Chasteaux & maisons
 fortes des Gentils hommes, & autres du
 party contraire, lesquelles ne seruēt que
 de retraites aux voleurs, & receptacles
 de leurs larcins, & d'empescher la liber-
 té du cōmerce, & qui causent vne gran-
 de despence a y entretenir les garnisons
 necessaires, & a les reprendre quād nous
 les perdons.

XIII. Procurer instamment l'amitié, al-
 liance & secours de tous les Princes,
 Seigneurs, & potentats Catholiques, &
 spécialement de ceux, de qui on peut
 attendre vn plus grand, plus asseuré, &
 plus prompt secours, comme font les
 ennemis avec tous les estrāgers hereti-
 ques, ce que nous pouuons & deuons
 faire à meilleure occasion.

XIIII. Renouueller vne declaration à
 la Noblesse, & autres de l'Vnion, pour
 faire entendre qu'ils combattent pour
 la Religion Catholique Apostolique &
 Romaine, & conseruation d'icelle à la
 posterité, comme aussi pour le bon Estat
 de ce Royaume. Et que Registres pu-

blics soient faicts, de tous ceux qui s'y employeront, pour estre leur merite sur la foy publique recogneu, ou en leurs personnes fils eschappent, ou en leurs veufues & orphelins, s'ils y meurent : lesquels registres, seront gardez és Greffes des maisons de villes & communautez.

XV. Qu'ordonniéz promptement estre arrestez tous ceux qui parlent auantageusement pour le Roy de Nauarre & punis selon la qualité des propos, sans conuenance ou acception de personnes.

XVI. Et afin qu'il y ait quelque difference entre ceux de nostre party, & les aduersaires : que l'Edict des blasphemateurs soit renouuellé, tât pour le regard des gens de guerre que des habitâs des villes & villages, & iceluy soigneusement executé.

XVII. Soit faicte punition exemplaire de ceux qui vollent ordinairement (principalement autour de Paris) ceux qui amèinent viures, tant par caüe que par terre : considéré que telle sorte de soldats, nous sont plus dommageables qu'aux ennemis.

XVIII. Et sur tous, soient chastiez sans re-

missiō, ceux de l'armee Catholique, qui commettent excès és Eglises & lieux sacréz, consideré que Dieu ne veut estre seruyde telles gens, en ceste cause, & ne dōne victoire a ceux qui laissent tels sacrileges impunis, ains faict prosperer ceux qui les punissent.

XVIII. Qu'il vous plaise pournoir de quelques predicateurs & confesseurs, pour subuenir aux necessitez spirituelles de vostre armee, pour entretenir les soldats en la crainte de Dieu, les enhortér au combat, garentir leurs consciences, & consoler a l'extremité.

X X. Aussi m'ont requis Messieurs de la faculté de Theologie, vous ramenuoir la promesse qu'il vous a pleu leur faire par vos lettres escrites d'Amiens, sur la prouision des benefices, Dieu ayant recompensé l'Empereur Othon, & plusieurs autres Princes en victoires notables, pour auoir esté fermes & roides en ceste resolution.

XXI. Nous vous sommōs sur tout Mōseigneur tant pour le general du Royaume que pour le particulier de ceste ville, de la iuste promesse qu'il vous à

pleu faire sur l'erection d'une chambre
composee de personnes capables zelez
& irreprochables & non suspects com-
me autresfois a esté heureusement pra-
ctiqué en France pour la punition des
traîtres, hereticques & autres faisans
actes preiudiciables à la sainte Vnion
des Catholiques sans permettre qu'on
y espargne personne quelconque à l'in-
stance ou requeste de qui que ce soit fust
ce Prince, Princeesse, Prelat, Capitaine
Seneateur parent ou autre, de peur que
par le Iuste courroux de la diuine maje-
sté (qui punist ordinairement avec grã-
de rigueur & feuerité ceux qui laissent
tels mesfaits impunis) & vous & nous
n'en portions la peine par la perte de la
Religion Catholique & desolation ex-
treme de ce Royaume.

Nous nous doubtons d'auoir forte
partie tant pour le nombre des coulpables
de ceste coniuration qui ne peut
estre petit que pour leurs parens amis
& aliez que nous scauons estre en grand
nombre principalement au corps du-
quel en autre chose nous pourriõs espe-
rer la Iustice. Mais preferans la Iustice à

toute autre consideration temporelle & fortifiez de vostre dicte promesse nous protestons, Monseigneur, vouloir continuer de vous faire avec le peuple ceste requeste à toute importunité & ne nous en departir iusques a tant qu'elle nous soit octroyee, si ce n'est que par vne bonne & briefue Iustice l'occasion nous en soit ostee. Autrement ne pouuons nous appaiser le peuple iustement irrité des abolitions qu'on procure & du retardement de la Iustice par le credit & artifice des coupables & ennemis subtils de la Religion, de l'Estat & de la patrie, ny mesmes cōtenir nos escoliers & petits enfans qui crient continuellement vengeance du sang encores chaud & fraichement espandu de leurs parés & amis, outre la trespernicieuse consequence que chacun peut veoir qui s'ensuiuroit de telle impunité.

Et partant Monseigneur nous vous supplions bien humblement d'auiser a ce que dessus, prendre le tout de bonne part & faire qu'il en sorte quelque bon effect vous le pouués, le secours celeste auquel debuez auoir plus de confiance

qu'en toutes les forces & prudences humaines, ne vous manquera en si bonne affaire & si iuste occasiō: L'Vniuersité en general & tous les supposits d'icelle en particulier se iertēt entre vos bras pour cest effect vous presentent par moy leur treshumble & bonnevoulonté & tout ce qu'ils y peuuent apporter, desirans singulierement que vostre autorité & grandeur soit assistee du peu qui est en eux par l'obeyssance qu'ils offrent de rendre en ce & en toute autre chose à vos saincts & vertueux cōmendemens. En demonstration dequoy vous voyez Monseigneur les quatre facultez de nostre dicte Vniuersité qui m'ont voulu assister en ceste humble & briefue remōstrance.

SUBSTANCE DE LA
responce faicte par mondit
Seigneur.

Monsieur le Recteur ie suis tres-aise que
vous & tous ceux de l'Vniuersité en-
uers laquelle ie suis autant affectionné qu'il est
possible pour y auoir autrefois esté nourri &
tous ceux de nostre maison, venez vers moy,
pour avec la liberté & franchise, qui doit estre
maintenue en vne republique libre, me discourir
selon l'occurrence des affaires tout ce qu'auex
sur le cueur, & pensez estre expedient pour la
conservation de l'honneur de Dieu, de la reli-
gion Catholique en ce Royaume & du bien ge-
neral de tous & particulier d'un chacun: n'ayāt
pas enuie de suruiure à la ruine & misere ex-
treme de France, ains ne desirant rien plus que
d'espandre iusques à la derniere goutte de mon
sang pour la remettre moyennant la grace de
Dieu, en sa premiere forme & splendeur. De vo-
stre presente requeste i'espere que par bō effet &
exécution plus que par promesses vn chacun co-
gnoistra combien elle me semble iuste & raison-
nable.

Et non content de ce, comme il est Prin-
ce debonnaire, fist cest honneur d'enuoyer Mon-

seur l'Euesque d' Agen, pour declarer plus am-
plement audiEt sieur Recteur, qu'il estoit infi-
niment content de la remonstrance qu'il luy a-
uoit faicte l'enhortant de continuer au soing de
la chose publique comme il auoit commencé.

FIN.